

YEMISI

Yemisi'a Yesu ge'amo ne'afiya vekamo tuolofu'a vayapati vekamo o'mai'nifa hamo'amo'mo mai'niye. Mani avo'mo kae'niya vekamo Yesu agana'amo'mo mai'neni Yulusalemu taonifi'mo mai'naya siosi vaya'aite'mo yagaino ne'apateya vayatama vekamo mai'niye. (Galesiya 1:19; 2:9). Agaemo tuolofu'a Yu nofi vaya'aife'mo mani avo'mo kae'niye. Agaemo apamalageka nehiya kavafe'mo avo'mo kaege Goti ge'amo fiku o'afi'a afite'a akame hisaya kavafe'mo avo'mo kaege aigofe apakesa afi'a fatago nehaya kavafe'mo avo'mo kaege apavayale'mo yagaisaya kavafe'mo avo'mo kaege ma mopafi kavafe'mo avo'mo kaege kagemi ya'apimo hane'niya vaya'aife'mo avo'mo kaege nunumu hisaya kavafe'mo avo'mo kaege huno mani avo'mo kae'niye.

1 ¹ Nagaemo Yemisi'namo Goti'e Ala kava ne'mo Yesu Kalaisi'e'mo ali'ya'anile'mo mai'nove. Nagaemo tuolofu'a Yu nofi vaya'mo kotapimo ataletapa atagu faetapa uteta hu'naya vaya'mogitapae'mo ge lapamamae'na mani avo'mo nekaove.

O'ataletapa Gotifeke'mo ge hutapa afi gegeno lapamino, huno hapa pai'niya gema

² Konaga'nimogitapae, lapakaetegamo asole hanageke kavapi'mo asagautapa ai'nisa'mo'mo lapamalageka nehisigetapae'mo alopa lamogaga aisuna agufa kava'mo afole ai'niye, hutapa lapakesamo afiyo.

³ Ago afi'nayana hanageke kava'mo'a lapakesa afita fatago nehaya kavatapile'mo lapamalageka nehisigetapae'mo o'ataletapa lokiya waitapa maisayafe'mo ani kava'mo'a lapaipafi'mo ali'ya'mo aligiye.

⁴ Lapaipafi'mo ali'ya'mo alisiya kava'mo ka akanitapa o'ategeno'ao alagi o'ataletapa lokiya waitapa maisaya himamutapimo alagepa huno ko sino afu lesigetapa haita me otaletapa haitapa hapaigae. ⁵ Lapakaepati'mo mago vekamo'a ageteno afi'niya kava'amo mago'e huno o'ali'nisiyana Gotife'mo ge huno afi genageno'ao Goti'a ge ohaugiyangenomuki vaya'aina mago'e huno alino ne'apamiya vekamo'a alino amino.

⁶ Amigiya'monanafa lole agesamo o'afi'neni alagepa huno agesa afino fatago hu'neni'ae'mo ge huno afi gegaiye. Lole agesamo ne'afiya vekamo solovala anite'mo yasimo ne'aligeno'ae'mo aino holakau

holakau hulino uneno nehiya agufa anikana huno mai'niye. ^{7,8} Agaemo magoke kavafe'mo agesamo o'afi'nifa lole agesamo ne'afiya vekamo mai'niya'mofe'mo Ala kava netegati'mo mago ya'mo afa'a o'aligiye. Fiku yanageno alitegauve, huno agesamo afigiye.

⁹ Apaki ohane'niya konagatimogi apaki'apile'mo Goti'a alino asaga huno apate'niya kavafe'mo apamogaga aiyo. ¹⁰ Kagemi ya'api'e vaya'mogi apaki'apile'mo alino afepi apate'niya kavafe'mo apamogaga aiyo. Yosa ausemo heno hifaliteni hali hu nelamiya kava hu'a faligae. ¹¹ Yegemo'mo haineno ne'agesigeno'ae'mo lusi kava huno amuko hu'nigeno kahaumo leno falu netegeni'ae'mo ause'amo hali hu nelamigeno'ae'mo konali ya'amo alagi hano nehiye. Ani kava hu'a kagemi ya'api'e vaya'mo ali'ya'apimo ne'alisaya folagapati'mo atale'a faligae.

¹² Hanageke kava'mo'mo apamalageka nehisi'ge'apae'mo o'atale'a atafau'a alagi hu'a mai'nisaya vaya'mogi Goti aulagale'mo alagepa hu'a ne'maiyanage'a afa'a apamogaga aigae. Na kava hisige'apaene. Apamalageka nehisi'ge'apae'mo o'atale'a atafau'a alagi hu'a mai'nisageno'ae'mo Ala kava ne'mo'a, nagaefe'mo hapau'niya'mofe'mo alagepa hu'a maige maige hu'a maisaya ya'mo ali'na apamiguve, huno hu'niya ya'mo aligae. ¹³ Apamalageka nehisiya vaya'mogimo, Goti'a hosu kava hisunafe'mo layate ne'aliye, hu'a apakesamo o'afisaya kava'mo hane'niye. Mago vekamo'mo Goti'a hosu kava'mo hisiyafe'mo ayate afa'a o'aligiye. Goti'a vaya'mogi hosu kava'mo hisayafe'mo apayate no'aliye. ¹⁴ Apakai'api apakufamo'mo hau'niya kava'mo'a apayate alino heno apavayu hulino hosu kavategamo ne'viye. ¹⁵ A'nemogi apaipagu'e'mo maite'a mafa'nemo ali'a ne'apataya kava huno apakufamo'mo hau'niya kava'mo'a aipagu'e'mo maiteno hosu kava'mo alino ne'ate. Hosu kava'mo alino ate'nigeno ko sino alopa heno mai'neni'ae'mo nefaliya kava'mo alino afole aino ne'ate. ¹⁶ Nahau'niya konaga'nimogitapae, humi lapatesayafe'mo hisaya gemo alagi o'afiyo. ¹⁷ Goti'a muki alagepa ya'e haino hapai'niya ya'e'mo fiku alino ne'apamigeno'ae'mo koku'napati'mo emine'niye. Muki koku'nate hane'neni aeno ha neleya ya'mo'a alu kava alu kava'mo huno aeno ha neleya'monanafa ani aeno ha neleya ya'mo Afo'amo'mo aeno no'atagaeya vekamo'a alu kava alu kava'mo osuno magoke agufa kava'mo huno fiku alino ne'apamiye. ¹⁸ Agaemo hau'nigeno muki alo huno apate'niya vaya'mo aeta apakaseta maisunafe'mo lama ge'aleti'mo alino late'nigeta mafa'ne'amo mai'none.

Goti ge'amo fiku o'afita afitetapa akame hiyo, huno hu'niya gemae

¹⁹ Nahau'niya konaga'nimogitapae, ge'aleti'mo alino lapate'niya'mofe'mo muki'amogitapamo ge'amo afisayafe'mo lapayamukiki hutapa afiyo. Gemo hugefeke'mo vase vase hutapa ge hiyo. Lapaipamo legefe'mo nehisi'getapae'mo vase vase hutapa lapaipamo

leno. ²⁰Na kava nehiya'mofe'mae. Vaya'ai apaipamo neleya kava'mo'a Goti fatago kava'amo alagi alino afole aino no'ate. ²¹Inagi muki hosu o'ani'ya kava'mo lapaipafi'mo havai te'niya kava'mo alita ataletetapa Goti aiyafi'mo ape huta mai'netapa lapaipafi'mo ago fai'niya ge'amo aliyo. Ani gemoke'mo lapakufamo alino katino lapategaiye. ²²Goti ge'amo fiku ne'afisayana lapakaitapie'mo humi lapategayanagi fiku o'afitapa alagepa huta afitetapa akame hiyo. ²³Fiku afiteno alagepa huno akame nosiya vekamo'mo vaya'mogi lave'yofati'mo apaugosamo ne'agaya kava huno ne'maiye. ²⁴Lave'yofati'mo augosamo ageteno ataleno ne'uno'ae'mo, haiya agufa naugosa'e vekamo mai'nofi, huno agesamo no'afifa malage huno ago age nekaniye. ²⁵Age nekaniya'monanafa mago vekamo'a Goti ke'aepa ge'amo'mo haino hapai'niya kanale ge'aleti'mo hatu maeno ne'apateya ge'ale'mo aulu haeno age'niya gee'mo age okanino agesa afifi nehuno akame nehisiyana kanale hugiye. Muki kava'amo nehisigeno'ae'mo Goti'a alagepa huno ha maegaiye. ²⁶Mago vekamo'a, mono vekamo mai'nove, huno agesamo afi'neno'ae'mo avayale'mo alagepa huno o'yagaino hosu gemo nehisiyana mono nehiya kava'amo ina agufa kava'mo hane'niyanageno alagi ha o'maegaiye. Agai'ae'mo humi ne'ate. ²⁷Goti'a muki ya'mo afo'amo aulagale'mo alagepa mono nehaya kava'mo hane'niyana kogu a'nemogi'e megusa mafa'nemogi'e'mo kanamo ne'aliya afina'mo u'a hapa maega ma mopafi vaya'mogimo ali'a hosu hu'a o'apatesayafe'mo apakai'apile'mo alagepa hu'a yagai'a apatege hu'a ne'maiya kava'mo hane'niye.

**Muki vaya'aitegamo magoke agufa kava'age'mo
hiyo, huno hu'niya gemae**

2 ¹Konaga'nimogitapae, lapakaemo Ala kava netimo Yesu Kalaisi'a ha le konali agi vekae'mo lapakesa afita fatago nehutapae'mo ala apaki vaya'aitega'e aise apaki vaya'aitega'e'mo magoke agufa kava'age'mo hiyo. ²Lapakaemo mono nehisage'anae'mo lole vekala'mo mago kagemi ya'a'e vekamo'a ayate'mo aenimo vaino aliteno kanale kukenamo vaili'niya veka'e kagemi ya'amo o'male'niya vekamo'a hosu kukenamo vaili'niya veka'e'mo e'ana hai e'ana magokepi maisa'agetapae'mo na agufa kava'mo anakaetegamo hugae. ^{3,4}Kagemi ya'a'e vekae'mo hao ke nehetapae'mo, alagepa siate'mo haikeka fai maiyo, hutapa ha paitetapae'mo kagemi ya'amo ohane'niya vekae'mo, afa'a maiyo, hutapa ha paisafi, haikeka mopafi'mo laiyaifi itopale maiyo, hutapa ha nepaisafi hosu lapakesamo afi'netapa alita fako hutapa ne'anatae. ⁵Ne'nahaiya konaga'nimogitapamo afiyo, Goti'a kagemi ya'apimo ohane'niya vaya'mo apakesa afi'a fatago nehaya kava'mo'a kagemi ya'apikana huno hanesige'a ne'yagaiya ko'mo alisayafe'mo lekana paino apate'niye. Goti'a agaefe'mo hapau apayamopafi'mo hapau'nisiya vaya'aife'mo, mafa'nemogi afo'apimo

ya'mo ne'aliya kava hutapa ani ne'yagauva ko'mo aligae, huno hapa pai'niya'mofe'mae. ⁶Maigaya'monanafa kagemi ya'apimo ohane'niya vaya'aina alita afepi apate'nae. Kagemi ya'api'e vaya'mogi kana ya'mo ali'a lapamige agoti hu'a lapatege nosafiye. Ha'ao, agoti hu'a nelapatae. ⁷Apakaemo lapakaefe'mo alagepa agi ne'aya agi'alefe'mo hu'a faipa hu'a ne'atae. ⁸Lapakaemo yagaino ne'apateya kini vekatapimo ke'aepa ge'amo Goti mukufi'mo hane'niya ke'aepa ge'amo akame nehisayana alagepa kava'mo nehae. Ani gemo'a huno'ae'mo, *lapakaitapie'mo lapau lapayamopafi'mo lapau'niya kava hutapa lapaopale'mo ne'maiya vaya'aife'mo lapau lapayamopafi'mo lapaino*, huno hu'niye. ⁹Mani gemo akame nehisayana alagepa kava'mo nehaya'monanafa alu vaya alu vaya'aitegamo magoke agufa kava'mo nosisayana hosu kava'mo nehae. Ani agufa hosu kava'mo nehisageno'ae'mo ke'aepa gemo'a huno'ae'mo, ke'aepa ge'amo aetapa atale ne'vaiya vaya'mo mai'nae, huno nehiye. ¹⁰Na kava nehaya'mofe'mae. Muki ke'aepa ge'amo akame nehu'apae'mo magoke ke'aepa gemo amagi'a ne'atalesayana muki ke'aepa ge'amo ago amagi'a ne'atalayanage'a vai'mo aligae. ¹¹Na kava hige'apaene. *Kumai kava'mo osiyo*, huno hu'niya vekamo'a mago'e gemo huno'ae'mo, *vaya'mo ohapaeyo*, huno hu'niye. Kumai kava'mo osutapa vaya'mo hapae'nisayana Goti ke'aepa ge'amo ago amagitapa atale'nae. ¹²Goti'a ago hatu maeno lapate'niya ke'aepa ge'aleti'mo alino fako huno lapategaiya'mofe'mo alagepa gemo huge alagepa kava'mo huge hutapa maiyo. ¹³Goti'a agoti huno apatesiya afina'mo mago vaya'aife'mo hapau hu'a no'apatesaya vaya'aife'mo hau huno o'apategaiya'monanafa hapau hu'a ne'apataya vaya'aife'mo Goti'a hau huno apatesiya kavateti'mo agoti hu'a ae'a agasegae.

Aigofe apakesa afi'a fatago nehaya kavafe'mo hu'niya gemae

¹⁴Konaga'nimogitapae, Mago vekamo'a, nagesa afi'na fatago nehuve, huno nehiya'monanafa alagepa kava'mo nosisiyana agesa afino fatago hu'niya kava'amo ina agufa kavane. Ani agufa agesa afino fatago hu'niya kava'amo'a afa'a ha maegaifiye. Ha'ao afa'a ha o'maegaie. ¹⁵Mago konagatapimo'mofi lapasatapimo'mofi huno kukena'a'e ne'ya'a'e'mo ohane'nisigetapae'mo, ¹⁶kukenaka'e ne'yaka'e'mo aligananagi uvo, hutapa ha paitetapae'mo alagepa huno maisiya ya'mo o'ami'netapa ge'age'mo nehisayana ina agufa gemo hane'niyanageno afa'a ha o'maegaie. ¹⁷Ani kava huno mago vekamo'a agesa afino fatago nehiya'monanafa alagepa kava'mo nosisiyana agesa afino fatago hu'niya kava'amo agai'age'mo hane'neni faligekana huno nehane. ¹⁸Hane'niya'monanafa mago vekamo'a, kagaemo kagesa afika fatago nehananage'na nagaemo alagepa kava'mo nehuve. Alagepa kava'mo nosisanana kagesa afika fatago nehana kavakamo alika nave liyo.

Nagaemo alagepa kava'nileti'mo nagesa afi'na fatago nehuva kava'nimo ali'na kave liguve, huno hugiye. ¹⁹Kagaemo Gotife'mo magoke vekamo mai'niye, huka kagesa afika fatago nehanana kanalene. Nehana'monanafa hosu apaune vaya'mogi'e'mo Goti'a mai'niye, hu'a apakesa afi'a fatago nehu'apae'mo atete nehae. ²⁰Negi vekae, kagesa afika fatago nehana'monanafa alagepa kava'mo nosana'mofe'mo kagesa afika fatago nehana kavakamo faligekana huno hane'niye, hu'na ali'na kave lisufiye.

²¹Laginago vekamo Emalehamu'a mafa'ne'amo Aisiki'a Goti'mo ofalinimo amisiyafe'mo yafa hi'yalamute'mo alino havaeno ate'niya alagepa kava'aleti'mo vaya'ai apaulagale'mo fatago vekamo mai'nifiye. ²²Lapakaemo ago afi'nayana a gesa afino fatago hu'niya kava'amo'e alagepa kava hu'niya kava'amo'e'mo magokepi lokae'ana ali'ya'mo ali'na'ageno alagepa kava'aleti'mo a gesa afino fatago hu'niya kava'amo'a ko sino afu le'niye. ²³Emalehamu'a hu'niya kavafe'mo Goti mukufi'mo avo kae male'niya gemo ago ha le yategamo alagi afole ai'niye. Ani gemo'a huno'ae'mo, *Emalehamu'a Gotifeke'mo a gesa afino fatago hu'nigeno'ae'mo, naulagale'mo fatago vekamo mai'nane, huno ha pai'niye.* Vaya'mogi, Emalehamu'a Goti ao vekamo mai'niye, hu'a hu'nae. ²⁴Lapakaemo ago age'nayana alagepa kava'mo nehaya vaya'aife'mo fatago vaya'mo mai'nae, hutapa apake'naya'monanafa apakesa afi'a fatago hu kava'ageke'mo nehaya vaya'mo fatago vaya'mo mai'nae, hu'a nosae.

²⁵Kumai kava'mo nehiya a kanomo Lehepi'a kame vaya'ai apamasa hisa'afe'mo e'na'a vekala'mo no'afi'mo u'ana havaesa'afe'mo havaesa'a ya'mo alino alagepa huno anate'nige'ana havaeta'ageno'ae'mo visa'a ka'mo alino ho huno anateteno anave li'niye. Ani kava'mo huno Goti'a ani a kanomo'a hu'niya alagepa kava'aletife'mo, naulagale'mo fatago a kanomo mai'nane, huno ha pai'niye. ²⁶Mago vekamo agufafi'mo auneme'amo ohane'nisiyana ago fali'niye. Ani kava huno mago vekamo'a a gesa'age'mo afino fatago huteno alagepa kava'mo nosisiyana a gesa afino fatago hu'niya kava'amo faligekana huno nehane.

Apavayale'mo alagepa hu'a yagaisaya kavafe'mo hu'niya gemae

3 ¹Konaga'nimogitapae, fiku yanagetapa muki'amogitapamo, lagaemo yagaita apatesuna tisa vaya'mo maigesune, hutapa hugae. Na kava hinagetapaene. Goti'a tisa vaya'mogitamo lusi kava huno agoti huno lategaiya'mofe'mae. ²Muki'amogitamo muki kava'alefe'mo haita me netalone. Mago vekamo'a avayaleti'mo alagepa ge'ageke'mo nehisiyana hosu kava'amo alagi ohane'niye. Ani agufa gemo nehisiya vekamo'a haino hapai'niya vekamo mai'nenno muki agufa'ale'mo alagepa huno afa'a yagaiyiye. ³Lagaemo hosimo'a getimo afiteno lakame hisiyafe'mo

aenileti'mo avayafi'mo nofi aeta ate'neta ka'mo alita ho huta ne'ateta avalelita ne'une. ⁴Lapakaemo sipi'efe'mo lapakesamo afiyo. Sipimo alopa yakefamo hane'niya'monanafa sipile'mo ne'aliya vekamo'a lusi yasimo ne'alino alino ago'ya failino ne'viya sipimo'mo aise ago'ya kayo'mo hane'nigeno alagepa huno yagai'nenno alino ho huno ne'ategeno ne'viye. ⁵Ani kava huno apavayamo apakufafi aise ya'atomo hane'niya'monanafa mago'e hu'na lusi gemo huguve, huno huteno himu'namu gemo nehiye. Ani kava huno aise atamo'a lusi kahau'fi'mo lelinuneno huno leno hano huno ne'ataleya kavafe'mo lapakesamo afiyo. ⁶Apavayamo atagana huno hane'nenno alu hosu ge alu hosu gemo nehiye. Lavayamo lagufafi'mo aise ya'atomo hane'niya'monanafa muki lagufa'amo alagi alino hosu huno nelate. Lavayamo'a ata kotegati'mo atamo aelineno muki vaya'amogita lahaopale'mo kae ne'male. ⁷Vaya'mogimo muki auneme'e ya'mo namagi nagalo'yavegi noyamemogi hu'a afa'a ali'a yuna he'a apatete'a yagai'a ne'apatayanage'a afa'a yagai'a apategae. ⁸Ali'a yuna nehaya'monanafa ani kava hu'a apavayale'mo afa'a yagai'a o'ategae. Lavayamo'a alagi gemo no'afiya ya'mo hane'nenno vaya'mo nete'a nefaliya analisa yakana huno lavayafi'mo havai teno hane'niye. ⁹Lavayafati'mo Afotimo Goti agi'ale'mo alita asaga huta ate'neta Goti'a agai'agana huno alo huno apate'niya vaya'aife'mo huta faipa huta ne'apatone. ¹⁰Konaga'nimogitapae, magoke lavayafati'mo alagepa gemo huge hosu gemo huge nehuna gemo'mo kanale gemo nosune. ¹¹Ne ani'e o'ne ani'e'mo meti ani'mo aeno latino haineno nelamiya ani'mo magoke kapat'i'mo haineno nolamiye. ¹²Konaga'nimogitapae, fiki yosamo'a alifi alagamo afa'a aegai'fiye. Nofimo'a fiki alagamo afa'a aegai'fiye. Ha'ao. Ani kava huno solovala anipati'mo haga ani'mo afa'a alino ohamalegaiye.

**Alagepa hu'a agete'a afi'naya kava'mo
Gotitegati'mo ne'e, huno hu'niya gema'e**

¹³Lapakaepati'mo ina la'mo afitenno age'niya ne'mo'a alagepa huno ne'afiye. Agaemo alagepa kava'aleti'mo agi'ale'mo alino afepi ne'atenno yagu yaga kava'mo nehuno alagepa huno afitenno age'niya kava'mo nehuno alino apave lino. ¹⁴Huno hugiya'monanafa hosu lapaipa kafa hapaeye hosu lapaipa kalitapa apatege ala lapaki alisayafe'mo lapauge hutapa ne'maisayana alagepa vaya'mo mai'none, huta nehutapa lama ge'amo aetapa ati okaeyo. ¹⁵Ani agufa agete'a afi'naya kava'apimo koku'napati'mo emi no'me'nifa ma mopafi vaya'ai kava'apimo apakufamo'mo hau'niya kava'mo Satanitegati'mo afole ne'aiye. ¹⁶Mono vaya'mogi apaipa kafa hapaeye ala apaki alisaya kavafe'mo hapauge hu'a mai'nisayana siosi vaya'mogimo alagepa hu'a o'mai'a muki alu hosu kava alu hosu kava'mo hugae. ¹⁷Hugaya'monanafa siosi vaya'mogi alagepa hu'a agete'a afi'naya kava'mo koku'napati'mo ali'nisayana hogote'a

yaveyave apaipamo alite'a alagepa hu'a magokepi lokae'a mai'ne'a yagu yaga kava'mo hu'a mai'ne'a vaya'ai ge'apimo afi'ne'a hapau hu'a ne'apate'a alu alagepa kava alu alagepa kava'mo nehae. Apakaemo muki vaya'aitegamo magoke agufa kava'mo nehu'a ae'a ati okae'a ha le yategamo ne'maiye. ¹⁸Ali'a nanu ae'a ne'apataya vaya'mogimo magoke apaipa ali'a ne'maiya afina'mo vase vase hu'a avina ya'mo nehakalageno'ae'mo fatago kava'mo'a alaga aegekana huno afole ne'aiye.

**Ma mopafi kavafe'mo nehapaiya vaya'mo Goti
kame'amo mai'nae, huno hu'niya gemae**

4 ¹Kame huge kaveta huge nehaya kava'mo aepa'ae'mo lapa paigesuve. Lapakufamo'mo hau'niya kavatapimo'a lapakufafi'mo kame nehigeno'ae'mo kaveta nehaya kava'e kame hutapa ne'apataya kava'e'mo alino afole aino ne'ate. ²Lapakaemo alu ya alu ya'mo alisayafe'mo lusi kava huno lapau'niya'monanafa no'aliya'mofe'mo vaya'mo nehapae. Alu vaya'ai yafe'mo lapa'ye nehaya'monanafa alisaya ka'mo alagi ohane'niya'mofe'mo ani vaya'aina kaveta hapaegge kame hutapa apatege nehae. ³Gotife'mo nunumu hutapa afi nekaya'monanafa no'aliye. Lapakufamo'mo hau'niya kava'mo hisayafe'mo hosu ge hutapa afi nekaya'mofe'mo no'aliye. ⁴Ve a'nemogitapamo kumai kava'mo nehaya vaya'mogitapae, ma mopafi kavafe'mo lapau'niya vaya'mogitapamo Goti'mo ataletuta alu vele'mo mai'netapae'mo kumai kava'mo hugekana hutapa mai'nae. Ma mopafi kavafe'mo nehapaiya vaya'mo Goti kame'amo mai'nae, hutapa o'afi'nafiye. Ma mopafi kava'mo ao vaya'amogimo Gotife'mo kame hu'a ne'atae. ⁵Goti mukufi'mo hane'niya gemo'a huno'ae'mo, lapakaepi'mo ne'maiya lapaunelapame'mo'a hosu kavafe'mo nehaigeno'ae'mo ha'ye nehiye, huno hu'niya gemo afa gemo hane'niye, hutapa lapakesamo ne'afifiye. ⁶Ha'ye nehaya'monanafa Goti'a fiku laha maeno mago'e huno nelamiye. Ani kavatefe'mo huno'ae'mo,
Goti'a ala vaya'mo mai'none, hu'a apakesamo ne'afiya vaya'aife'mo
kame huno ne'apateya'monanafa ina agufa vaya'mo mai'none,
hu'a apakesamo ne'afiya vaya'aina fiku hapa maeno ne'apamiye,
huno hu'niye.

⁷Ne'apamiya'mofe'mo Goti aiyafi'mo maiyo. Satanife'mo kame hutapa ategenao lapakaetegati'mo ataleno aune heno. ⁸Goti haopale'mo vigeno'ao lapakae lapaopale'mo eno. Hosu kava'mo nehaya vaya'mogitapae, hu'na, lapaya'mo sese hiyo. Lole lapakesamo ne'afiya vayanagi lapaipafati'mo o'ani'yamo aeta kalo paetapa ataleyo. ⁹Lapaipamo'mo lusi kava huno kana nehinagetapa yulagefa aitapa avi'ya hiyo. Kigi nehaya kavatapimo ataletapa yulagefa aiyo. Lapamogaga ne'aiya kavatapimo ataletapa lapaipamo'mo kana hino. ¹⁰Ala kava ne'mo aulagale'mo lapakufamo alita afepi ategenao alino asaga huno lapateno.

Konagatapimo alita fako hutapa o'apateyo, huno hu'niya gemae

¹¹ Konagatapimogife'mo hutapa faipa hutapa o'apateyo. Mago vekamo'a konaga'amofe'mo huno faipa huno ateteno alino fako huno ne'atesiyana Goti ke'aepa ge'ae'mo huno faipa huno ateteno alino fako huno ne'ate. Lapakaemo ke'aepa ge'amo alita fako hutapa ne'atesayana ke'aepa ge'amo akame osutapa ke'aepa ge'amo alita fako hutapa ne'atae. ¹² Ke'aepa ge'amo alino apami'niya Goti'a magoke vekamo mai'niye. Agaemo apakufamo afa'a alino katino apatege alino apago'ya lagauno apatalege nehiye. Lapakaemo alita fako hutapa apategefe'mo nehisayana lapakaemo ina lagitapamo mai'nae.

**Afa'a hugune, hutapa himu'namu agufa
gemo osiyo, huno hu'niya gemae**

¹³ Mago vaya'amogitapamo, hemenimofi egamofi huta uta taonifi'mo mago kafuga maita ali'ya'mo aliteta monimo aligune, hutapa nehae. ¹⁴ Nehaya'monanafa egamo na kava'mo afole aigifi hutapa o'afi'nae. Lapakaemo na agufa yakana hutapa mai'nae. Lapakaemo netepi'mo yosale'mo aise hiya'mo ki'nigeno yegemo haineno nelegeno'ae'mo alino hano hulino ne'viya hiyakana hutapa mai'nae. ¹⁵ Lapakaemo, afa'a hugune, hutapa hosu gemo nehaya'monanafa Goti'a hau'niyanageta mani kava'mofi ina kava'mofi huta afa'a hugune, hutapa hugae. ¹⁶ Hisaya gemo hane'niya'monanafa hemenimo lapakaemo, afa'a hugune, huta hutetapa lapakitapile'mo alita asaga hutetapa himu'namu gemo nehae. Ani agufa himu'namu gemo nehaya gemo hosu gemo nehae. ¹⁷ Alagepa kava'mo hisaya kava'mo hane'nige'a ne'agaya'monanafa nosisayana hosu kava'mo nehae.

Asole kagemi ya'apimo hane'niya vaya'aife'mo hu'niya gemae

5 ¹ Asole kagemi yatapimo hane'niya vaya'mogitapae, lapakufale'mo afole aisiya hanageke yafe'mo lapakesamo ne'afitapa ai ai aetapa avi'ya hiyo. ² Kagemi yatapimo kasalige kukenatapimo kafamo'mo hatagauge monitapile'mo o'ani'ya faige huno hane'niye. ³ Monitapile'mo o'ani'ya fai'niya ya'mo'a agoti huno lapateteno atagana huno leno lapasaga ligiye. Lapakaemo henaga afinafe'mo mago'e kagemi yatapimo alita anupa hutapa malege malege hutapa ne'maiye. ⁴ Ali'yatapimo ne'aliya vaya'mogi hoyatapifi'mo ali'ya'mo ne'aliya vaya'aife'mo humi ne'apatetapa hosu miya'mo ne'apamiye. O'apami'naya monimo'mo hosu kavatapile'mo keya aeno ge hugekana huno hane'niye. Ali'yatapimo ne'aliya vaya'mogi keya ae'a ge nehageno'ae'mo Ala kava ne'mo'a muki koku'napi ne'maiya vaya'aite'mo yagaino ne'apateya vekamo'a ani keya ae'a ge nehaya gemo ne'afiye. ⁵ Lapakaemo muki ma mopafi

kagemi yatapimo agetapa alita malege lapakufamo'mo hau'niya kava'mo huge hutapa mai'nae. Muki afina'mo afumo he'a lusi yagita nehaya kavakana hutapa mai'netapa apaipagu'e vayakana hutapa mai'nae. ⁶Lapakaemo fatago vaya'aina agoti hutapa apatetetapae'mo kamiti apamagi'nae. Afa'amo mai'ne'apae'mo lapakaetegamo mago kava'mo osu'naya'monanafa fiku apamagi'nae.

**Goti mafa'ne'aife'mo, o'ataleta atafauta alagi
hu'netapa agava maiyo, huno hu'niya gemae**

⁷Konaga'nimogitapae, kagemi ya'api'e vaya'mogimo ani kava'mo nehaya'mofe'mo o'ataleta atafauta alagi hu'netapa agava maima maima ne'vigeno'ao Ala kava ne'mo emineno. Hoyamo ali'a ne'vaiya vaya'mogimo avina ya'mo nehakalaya afina'e ne'ya'mo hagesige'a alisaya afina'efe'mo o'atale'a atafau'a alagi hu'a mai'ne'apae'mo agava ne'maiye. ⁸Ani kava hutapa atafauta alagi hu'netapae'mo o'ataleta agava maiyo. Ala kava ne'mo aise afina'mo emi'negaiyanagi lapaipamo alita lokiya waitapa lapateyo. ⁹Konaga'nimogitapae, hu'na, konagatapie'mo ge ohapaiyo fiku yanageno Goti'a hosu gemo nehae, huno hugiyanagi. Afiyo, hu'na, alino fako huno apatesiya vekamo kipate'mo he tino ne'maiye. ¹⁰Konaga'nimogitapae, ema akeya'vilaga vaya'mogi Gotitegati gemo alini e'a ae'a hakalo hu'a hapa nepaiya vaya'ai kavafe'mo lapakesamo ne'afitapa apaiyakamo aliyo. Apakaemo Ala kava ne'mo agi'alefe'mo ge'amo hapa nepai'apae'mo kanamo ali'ne'apae'mo o'atale'a atafau'a alagi hu'a mai'nae. ¹¹Lagaemo, o'atale'a atafau'a alagi hu'a mai'naya vaya'aife'mo Goti'a, naulagale'mo alagepa hu'a mai'naya vayane, huno nehiye, huta nehune. Lapakaemo ago afi'nayana akeya'vilaga vekamo Yopu'a kanamo ali'nenoe'ae'mo o'ataleno atafauno alagi huno maima maima ne'egenoe'ae'mo Ala kava ne'mo'a ha mae'niya kavafe'mo ava gemo ago afi'nae. He, Ala kava ne'mo'a lusi kava huno hau huno ne'apateno hau ayamopafi'mo nehaya vekamo mai'niye, hutapa ago afi'nae.

¹²Konaga'nimogitapae, hogote kava'mo ina kava'mo huno hane'niyanagi getapimo alita lokiya waitapa atesayafe'mo hutapae'mo koku'nategae'mofi ma mopalefe'mofi alu yateti'efe'mofi hutapa alagi lama gemo nehuve, hutapa osiyo. Fiku yanageno Goti'a agoti huno lapategaiya'mofe'mo he, nehutapae'mo he'age'mo hiyo. Ha'ao, nehutapae'mo ha'ao'age'mo hiyo.

Siosi vaya'mogi hisaya kavafe'mo hu'niya gemae

¹³Lapakaepati'mo mago vekamo'a kanamo ne'alisiyana nunumu hino. Lapakaepati'mo mago vekamo'a amogaga ne'aisiyana samu mono yokemo hino. ¹⁴Lapakaepati'mo mago vekamo kaita nehaisiyana siosi vaya'aite'mo yagai'a ne'apataya vayatama vaya'aife'mo ge hino. Ge

hisage'a e'a Ala kava ne'mo agi'aleti'mo uvelimo agenopale'mo fale'a atete'a nunumu hu'a ategae. ¹⁵Apakaemo Gotife'mo apakesa afi'a fatago nehu'a nunumu hu'a atesageno Ala kava ne'mo'a alagepa huno alino he tino ategaiye. Kaita hau'niya vekamo'a hosu kava'mo hu'nisiyana Ala kava ne'mo'a alino atalegaiye. ¹⁶Lapakaemo konagatapimogife'mo hosu kavatapie'mo aeta hakalo hutapa hapa paige'a apakaemo ani kava hu'a hosu kava'apie'mo ae'a hakalo hu'a lapa paisagetapa nunumu hutapa apatege'a ani kava hu'a nunumu hu'a lapatenagetapa higeno'ao Goti'a alino alagepa huno lapateno. Fatago vaya'mogimo aukaya hu'a nunumu hu'a ge hu'a afi nekageno'ae'mo Goti'a himamu lokiya'aleti'mo ali'ya'mo aliteno alino afole aino ne'ate. ¹⁷Ilaiya'a velafa'mo mai'nenno lagaekana huno mai'niya'monanafa lokiya vaino nunumu huno'ae'mo, ko o'aiyo, huno nunumu hu'nigeno lole'e mago'e kafuga'e sigisi'a kaile'e'mo ko o'ai'niye. ¹⁸Halate nunumu hu'nigeno koku'napati'mo ko ai'nigeno'ae'mo mopafati'mo ne'ya'mo hage'niye.

¹⁹Konaga'nimogitapae, lapakaepati'mo mago vekamo'a alagepa ka'mo ataleno uneno nehisigeno'ae'mo mago vekamo'a avaelino esiyana, ²⁰Hosu kava'mo nehiya vekamo'a hosu kava'mo osuno alagi atalesiyafe'mo alino aino atagi neno avaelino e'niya vekamo'mo, fali kavategati'mo agufamo alino katino atesigeno Goti'a asole hosu kava'amo aeno ati kaeno ategaiye, huno agesamo afigiye.